

KIRI DAUDA



The history of King David in Kyanga as recorded in the books of the prophets: 1 Samuel 16-20 and 2 Samuel chapters 1-12.

Sama'ila takada farashinaa

Sama'ila yōnɔkana Dauda miima

Zɔnadi fi Sama'ilani: Ní ua Saulu musu hari di borokpa? Ma jè ina kirike Isra'ilanama. Yōnɔ ka bē nà fà, n dɔ jerema. Ma n dē Baitalami gū Yeshe gu, zaaka i ni duu ye ma bòwi ina gbɛɛgū kiri. Ye Sama'ila kè: Laala ma kea mà yaa gube? Saulu nà mà, i ma dea. Zɔnadi fi'ini: Di zuuyaa shite n yaazɔ, n ke n nù sāmakɛɛjimama. Yeshe shishi sāma ginaa kenaalu, yā ka n kea má fia'nni, n yōnɔ kamani gū ka má mɔa'nni miima.

Yā ka Zɔnadi fi'ini Sama'ila kè. Ka ibi burua Baitalami, fara ginaa guce'ashina yà daaji'ile. Wohu i à kù, ye à i làlu i kè: Baani n nù gulea? I kè: Baanimi. Ma nù sāmakɛɛji Zɔnadima. À gbācibɔ a gindani, à yaamazɔ sāmakɛɛji. Ye i gbācibò Yesheni kūni i ni nigōninazɔ, i à shishi sāmakenaalu. Ka à bùru, Sama'ila Eliabu wà, ye i laasaabukè i kè: Gū ka Zɔnadi bòwi ye dùce a watalu gube. Ye Zɔnadi fi'ini: Mba waadɔ i ducenaa koo i saakɛɛjiba, ma jè'iji. Mabata waadɔ gūji laaka guce tà waadɔba. Guce tà waadɔ gūji i werema, mani kīn, zūn ye mata waadɔji. Ye Yeshe Abinadabu shishi, i nù Sama'ila watalu, ye i kè: Zɔnadi ci gū lee bowiba. Ye Yeshe Sama shishi, i nù Sama'ila watalu mɔnɔ, ye i kè: Zɔnadi ci gū lee bowiba. Ye Yeshe a ni nigōni sɔɔfiaa shishi, à nù Sama'ila watalu, ye i kè:

Zɔnadi ci à gũkan bowiba. Ye ì Yeshe làlu ì kè: N jingina len lea? Ì wì'ini ì kè: À daku ye ba bii guleba, ibi tambuna kurukea. Ye Sama'ila fì'ini: Gũ dē ì shishiiji. Wóba sãmakeaba sai ina buru gule. Ye ì gũ dē'ima, ì nù. Ni ginaa gũ tēemi, ì were 𐌆𐌆𐌆𐌆𐌆 ì werelu 𐌆𐌆𐌆. Ye Zɔnadi kè: Kpete n̄ yɔ̃nɔ ka ì miima, zaaka inin be. Ye Sama'ila bē ginaa shìte ì yɔ̃nɔ kà ì miima ì bakerena wadajĩn. Zaa dibēdi Zɔnadi Nanii kà Daudama. Bē gbēji Sama'ila cēē ì yà Lama.

Dauda dikinakena Sauluni

Zɔnadi Nanii gù Sauluma, ye Zɔnadi tù ji zaa kà'ima. Ì ibana fì'ini: Ladu tù ji zaa kà'mma. Laaka laalemi Baaba, tu woninɔ n ibana wò gũ tɔ̃'nni ka kwansa d̃̃. Ladu nà tu jìi za ginaa nà shia'mma, ì kwansadea'nni, n̄ daamamaa. Ye ì fì a ibanani. Gũ ka kwansa d̃̃ 𐌆𐌆𐌆𐌆𐌆 à tɔ̃ à nu'izɔmani. Ye ì iba kē fì'ini: Ma Baitalami gũ Yeshe ni kē wà, ì kwansa d̃̃. Nigōni gbāda dēbukedami, mɔ̃nɔ ì yāfi d̃̃. Nigōni nɔ̃mi, mɔ̃nɔ Zɔnadi bii'izɔ. Ye Saulu gūna dē Yeshema, à fì'ini: Saulu kē n̄ ni Dauda ka tà tambuna kuruke n̄ ì da'ani.

Ye Yeshe burodi d̄i farigaani kūni inabi'izɔ tɔ̃ɔ du kūni bui nigōni bɔ̃ɔɔɔɔ, ì ì ni Dauda dēzɔ Sauluma. Ka ì bùru Saulu gu, ì gbēegū ì ibaa. Saulu waa'iji 𐌆𐌆𐌆𐌆𐌆, ye ì ì d̄i a dēkebɔkūda. Ye Saulu gũ dē Yeshema ì kè: Tu Dauda nà gbēegū ma ibaa, zaaka ì yā tà kemani nda. Ladu nà tu jìi ginaa nà shia Sauluma, ye Dauda tà a kwansa shite ina de'ini. Jii ginaa nà yaa, ye ita daamama, ita ci a laakalima.

Dauda kŭni Goliatazo

Filishitinina à à dēbukedana dākū, àbi dēbu soolukea Soko, Yahuda cerelu, ye à gaa gifa Efedamimu, Soko kŭni Azekazo buden. Saulu kŭni Isra'ilanazo kŭn à dākū à gaa gifa Ela gugbangarama, àbi soolukea àna yaa Filishitininama dēbuulu. Filishitinina bii kasa leleema, Isra'ilana bii kasaa leema, guwucenaa bii à buden. Ye Gata nigōni ka wōta ke Goliata bō Filishitinina gaalu. Ì saakee bùru ɔkūsū sɔɔdu. Ì mɔtē fula kà, mɔnɔ ì mɔtē tɔgɔɔ kà ka bii du zōgbaraazo, ì gbītā kilo kee'a. Ì mɔtē dɔbɔɔ ìri mɔnɔ, ye ì mɔtē sutaa kɔtɔkè ì ishēma. Ì shingii kŭ, ì ba bii du bishekeda gyaazo. Ì nene gbītā kilo sɔɔfia. Ì lebɔkūda bii watalu'ini.

Goliata dùce, ye ì lezù Isra'ila dēbukedanaji ì kè: Bɔyāaji a bō kŭni dēbuuzɔ? Aci dō Filishitinimi mania? Aninɔ kŭn, Saulu zɔkedana. À gŭkee tō'alu ina ice ina nu ma gu. Inaa fōa ina dēbuukemazo, ina ma de, ma gŭna gbɛegŭa a zɔna. Ina mani ye ì dè kŭn, á gbɛegŭa wo zɔna, á zɔkeawoni. Ye Filishitini ginaa cēe ì kè: Mabi lalufurua Isra'ila dēbudanama cece. À gŭ tōmani wò dēeke kŭzɔ. Ka Saulu kŭni Isra'ilanazo pai à ì yā ginaa mà, à bitikè, à zŭn kàta.

Dauda Efarata gŭ Yeshe nimi. Yeshe Baitalami ka bii Yahuda cerelu gŭmi. Ì ni'ì nigōnina soowa, mɔnɔ Saulu lootoo ì kè mare, ì jidakè kɔtɔkɔtɔ. Ì ni gbāda àa bii dēbugu kŭni Sauluzɔ. Ì nigōni farashina tōmi Eliabu, fiadibi tōmi Abinadabu, adibi tōmi Sama. Daudami Yeshe ni gbējizɔ. Ì bakerenano dō Sauluma, ye ini ita yaa Saulu gu, ita cēe ina ci Baitalami ì djii

tambuna kurukegu. Filishitini ginaa b̀̀̀ ginda m̀̀̀̀ni saraazɔ
kũni itɔkɛɛzɔ hari di keefia.

Dikeedi Yeshe fi ì ni Daudani: Naga kpetena fe du lee kûni burodi guda koori leezɔ shite n̄ yaazɔ kyāakyāa n bakerenani à gaalu. Diyɔ̃'i deecena guda koori lena shite n̄ kpa à gandu guce ashini. Yaa n̄ à wà ànaa bii baani, n̄ ci kûni à baani sheeduzɔ. À bii kûni Sauluzɔ kûni Isra'ilanazɔ pai Ela gugbangarama, àbi dēbuukea kûni Filishitininazɔ.

Dauda kpète saraazɔ, ì ì tambuna tù kûni tambukurukeda kɛɛzɔ. Ì a asu shìte, ye ì dò jerema laaka Yeshe dì'ini. Ka ì bùru dɛbukedana gaalu, ì nù ì lì àbi yaa dɛbugu, àbi una gbādaa kɛa. Isra'ilana kûni Filishitininazɔ bi soolukea àna weredɔ kûma. Ye Dauda ì asu nà fɔna dāda ɔɔlu, ye ì bashì ì yà dɛbugu. Ì a bakerena lì gube, ye ì hookpà'àni. Ka ibi yāfia'àzɔ, Filishitinina nigɔni Goliata, Gata gū bɔ Filishitini dɛbukedana kānalɔ, ì cɛɛ ì kpète kûni ì yā ginaazɔ. Dauda yā ginaa mà. Ka Isra'ilana à ì wà, à zūn kàta mɔnɔ, à bashì pai. Àbi fia kûni à kè: Aci nigɔni ginaa wa ì bɔba dee? Ina bɔ, ita lalufuruwoma. Gū ka ì dè, kiri ì gbaa fɔ gbāana, ì ì gbaa ì ni negū mɔnɔ nɛɛ, mɔnɔ ì wei gūna ba jangali kpaa mɔnɔba.

Ye gūna ka dūce Dauda kutu, ì à làlu ì kè: Bó ye wò kea gūni ka Filishitini ginaa dè ì Isra'ilana bò unilu? Din Filishitini bangubadi ginaa, ibi lalufurua Ladu hundinadi dēbukedanama? Ye wò f'i'ini laaka gūna bi fia kūni wò kè: Laale wò kea gūni ka ì dè. Ka ì bakere ashi Eliabu mà Dauda bi yāfia kūni gūnazo, ì zūn fà'iji ì kè: Ì kè laala n nù gule? Dini n

tambu jīnna tū ì ɔɔlu lahoolu? Ma n burunaa dǝ kūni n zūn vānikεεɔ. N nū ñ waado dēbuuji. Dauda kè: Bó ye ma kè? Baa yā mába fia? Ye ì a gbēji sòri'ini ì yà yā du ginaa làlu gūkeema. Laaka gū farashinaa fi'ini, laale wò fi'ini mɔno. Yā ka Dauda fi ginaa wò deedeekè Sauluni, ye ì ì shìshi.

Ka Dauda nū, ì fi Sauluni: Gūkan naba tu ì zūn nà kata Filishitini ginaa yā musuba. Mani n zəkeda, má yaa mà dēbuuke'izɔ. Ye Saulu fi'ini: M̃ba f̃ɔa ñ yaa ñ dēeke kūni Filishitini ginaazɔba. Ni bɔtɔɔmi nni. Nigōni ginaa kīn, dēbudami zaa ì jingikedi. Ye Dauda fi'ini: Mani n zəkeda, mani ye tà ma djii tambuna kuruke. Musu'ashi koo kpagu nà nu ina tambu kū gaalu, mata do ì gbεema mà ì wā mà tambu ginaa bɔ ì lelu. Ina cēmama, mɔno mata ì kū ì lekākāma mà wā mà dε. Mani n zəkeda, ma musu'ashi kūni kpaguzɔ dè pai, mɔno Filishitini bangubadi ginaa gbεgūa du fɔnanɔɔ, zaaka ibi lalufurua Ladu hundinadi dēbukedanama. Dauda cēε ì kè: Laaka Zɔnadi ma bò musu'ashi kūni kpaguzɔ lelu, laale ì ma bɔa Filishitini ginaa ɔɔlu. Ye Saulu fi'ini: Yaa! Zɔnadi nagū bii'nzɔ.

Saulu a dēbutɔɔɔ kà'ini, ì a mɔtē fula kà'ini, ye ì a mò tɔɔɔ kà'ini. Dauda Saulu takuba kɔtəkè dēbutɔɔ ginaama. Ka ì yǝ tanaama, ye ì gānadè, zaaka ici saabokezɔba. Ye ì fi Sauluni: Mába f̃ɔa mà yaa kūni fɔnanɔɔɔba, zaaka maci saabokezɔba. Ye ì fɔnana bò pai ì dī. Ì a gyaa shìte, ye ì yà ì gberε lolɔnaa shìte ibashima guda sɔɔru, ì kà a kurukebɔɔɔlu. Ye ibi nua kutu Filishitini ginaa gu, ì ì bindo kũ.

Ye Filishitini ginaa bi nua Daudaji, ì lebəkūda bii'ini watalu. Ka ì waadò Daudaji, ì wà ni bɔtɔ tẽ nɔɔmi, ye ì dɔkè'izɔ. Ì kè'ini: Gbɛ̃emii mani, ka mbi nuamama kūni gyaazɔa? Ye ì ì laalikè kūni ì dɔma tɔzɔ. Ye ì cɛ̃e ì kè: Numaji, bāna à n sua, lahoolu sōna à n kasukasua. Dauda fi'ini: Takuba kūni sutaazɔ kūni shingiizɔ ye mbi nuazɔmaji. Mani kīn, Zɔnadi Dēbunadi Isra'ilana Ladu ka mbi lalufurua'ima tɔ ye mabi nuazɔ'nji. Zɔnadi ì n naamani ma ɔɔlu cece. Má n zukua, má n mii jēa, má Filishitini dēbukedana gena kpaa bānani kūni lahoolu sōnazɔ cece àna su, dunia dōa Ladu bii kūni Isra'ilanazɔ. Gūna ka dākū gule dōa Zɔnadi bata dēbuubi kūni takubazɔ koo shingiizɔba. Zɔnadi ye dēbuu zɔ, ì a naawoni wo ɔɔlu.

Lootoo ka Filishitini ginaa bi nua Daudaji, ibi nua ina utō'ima, ye Dauda bashì ibi nua'ima guulu ka wò dē̃ekēa. Ye ì ɔkà ì bɔɔɔɔlu, ì gberɛ̃e bò ì kà a bindolu. Ka ì zù ì Filishitini ginaa fà ì erema. Gberɛ̃e ginaa sūtɛ̃ ì erɛ̃ ginaalu, ye ì sùte ì gberɛ̃ema. Bindo ye Dauda dēbuubìzɔ Filishitini ginaama. Ì ì fà ì ì dè̃ce, baa takuba ici kūba. Ye ì bashì ì yà ì kùce'ima, ì ì takuba ùsō ì kpelu, ì ì dè ì ì mii jēzɔ. Ka Filishitinina wà nno nigōni ginaa gà, à bashì. Ye Isra'ilana kūni Yahudanazɔ à à kè̃ke kūni dindanaazɔ, à à kè̃ke hari Gata lema kūni Èkeroni bīnni lezɔ. Gūna ka à à dè̃de gena gbè̃egū kana zaa Saarimu jerema hari Gata kūni Èkeronizɔ. Ka à cì kūni Filishitinina kekenaazɔ, ye à à gaa fɔna dākū. Dauda Filishitini ginaa mii shìte ì yàzɔ Urusalima, ì ì dē̃kebɔna kà ì koru.

Lootoo ka Dauda bi nua Filishitini ginaaji, Saulu bi waadɔa'iji, ye ì ì dēbukedana guce ashi Abinee làlu ì kè: Dí nimi jingi ginaa? Ì wì'ini ì kè: Kiri, kŭni n hundiizɔ, maci dōba. Ye kiri kè: Lalu ò mà gŭ ka ì nimi jingi ginaa. Ka Dauda cì kŭni Filishitini ginaa denaazɔ, Abinee ì shìte ì yà'izɔ Saulu gu, ì Filishitini ginaa mii kŭ. Ye Saulu ì làlu ì kè: Ni, dí nimi nni? Ì wì'ini ì kè: N zɔkeda Yeshe, Baitalami gŭ nimi mani.

Saulu gaabakena kŭni Daudazɔ

Ka Dauda yāfi kŭni Sauluzɔ ì ìnce, ye Yonatā tɔkè'izɔ, ì waa'iji du a gindazɔ. Zaa dibeedi Saulu ì dī ì wei, ici wiji ina yaa ì djii wei mɔnɔba. Yonatā lekedukè'izɔ, dun ì waa'iji du a gindazɔ. Ye ì gōbishe ka ì kà bò ì ì gbà kŭni ì dēbutɔgɔɔzɔ kŭni ì takubazɔ kŭni ì sáazɔ kŭni ì beezɔ. Guu ka Saulu Dauda dē dēbuukeɛji pai, ita sa'aa li, ye ì ì dī dēbukedana guce ashi. Ì yā tà ke gŭpaini nda kŭni Saulu ibanazɔ pai.

Ka dēbukedana bi cia Dauda Filishitini ginaa denaa gbēji, negŭna bò Isra'ila faranalu pai, à yà daaji à kiri Saulule, àbi leeshia, àbi bebea, àbi maa dea, àbi zŭn'ndaakea, àbi shēkēshēkē wāa. Àbi leeshia, àbi daa kŭni, àbi bebea, àbi kea:

Saulu gŭna dēde dubu du (1,000),

Dauda kŭn dubu koori (10,000).

Yā ginaa kè Sauluni za nɔɔnɔɔ, ye ì zŭn fà ì kè: Wò dubu koori kpà Daudani, mani kŭn dubu dumi. Kirikee ye gbèegŭ ina shite bece. Zaa dibeedi ì weretēē'ima.

Ka di kè, ye Ladu tù Saulu jì za ginaa shà, ibi yābereketefia a koru, ye Dauda a kwansa shìte, ibi dea laaka ita ke dipai. Saulu a shingii kù, ye ì zù ì kè: Má Dauda faazò mà ì dakũ kũni tātāazò. Ye Dauda ɔdèni tara fia. Saulu tà wohuma Daudani, ka Zɔnadi bii'izò mɔnɔ ì pākpa'iji yāaji. Ye ì Dauda kèke ì ì dī dēbukeda dubu du guce ashi. Ini ye tà ke'ani watalu dēbugu. Guu ka ì yà pai ita sa'aa li, dun Zɔnadi bii'izò. Ka Saulu wà ita sa'aa li, ye ì wohumà'ini ì kpà yāala. Isra'ilana kũni Yahudanazò kīn à waa Daudaji à pai, dun ita ke'ani watalu dēbugu.

Ye Saulu fi'ini: Má ma ni negũ farashina Merabu kpaa'nni nɛɛ. Nigɔnikɛɛ ke ñ dēbuukemani Zɔnadini. Zaaka Saulu laasaabukè ì kè: Mába ɔkea'imaba, Filishitinina ye à ì dea. Ye Dauda fi'ini: Din mani? Dinɔn ma wei gũna kũni ma djii benazò dun mà gĩnaa gbɛegũ n ni zā? Ka Merabu bùru wòna ì kpa Daudani, ye Saulu ì ì kpà Mehola gũ Adielini.

Saulu ni negũ Mikali waa Daudaji. Ka wò yā ginaa fi Sauluni, ì kè'ini nda ì kè: Má ì kpaa'ini, ì gbɛegũa'ini du cekũzò, Filishitinina à ì dea. Ye ì fi Daudani: tara fiadibi: N gbɛegũa ma ni zā cece. Ye ì fi a ibanani: À yāfi Daudani ashirilu, à fi'ini ì yā kèmani nda, mɔnɔ ma ibana waa'iji pai. Ina ma ni negũ shi. Ì ibana yā ginaa kà Daudani ì tɔnɔlu, ye ì fi'ani: Gbɛegũna kiri ni zā yā faalami dee? Tɔbadi taabinadimi mani. Ka Saulu ibana cì, à Dauda yā ginaa deedeekè'ini. Ye Saulu kè: À fi'ini mába waa mirake fɔkanjiba, sai ina findebumani ma jedi

Filishitininama, ina cimanì kũni à bangunazɔ guda keesɔru. Ibi waa Filishitinina à ì dea.

Ka ibanano yã ginaa deedeekè Daudani, gbɛɛgũna kiri ni zã kè'ini nda beɛɛ. Hari negũ ginaa shidi burua, Dauda kũni ì dɛbukedana kpète à yà à Filishitinina dède gũ keekoori, ye ì cì kũni à bangunazɔ, ì kpà kirini pai, dun ina gbɛɛgũ ì ni zã. Ye Saulu ì a ni Mikali kpà'ini nɛɛ. Ka Saulu wà laale, ì dɔ̃ Zɔnadi bii kũni Daudazɔ, mɔno a ni Mikali waa'iji, ye ì wohumanaa lafà, ì gbèɛgũ ì jedi hari ì gà. Lootoo ka Filishitini kirina bò à yà dɛbuukeɛji, Dauda tà sa'aa li ì kpà Saulu iba kenala, ye ì tɔbò nɔɔnɔɔ.

Saulu kɔntɔkena Daudaji

Saulu fì ì ni Yonatãni kũni ì ibanazɔ pai àna Dauda de. Amaa Yonatã waa'iji gbãa, ye ì ì gbà laakali ì kè: Ma djii bi n tɔa ina n de. Ñ n gindakũnaa dɔ̃ lefũ saraazɔ. Dudugu tɔ̃ ngũ biilu. Má boa fara baa kũni ma djiizɔ, wó duɛɛa guu ka n dùdu. Má n yã fia'ini. Laaka ì fimani, má fia'nni.

Ye Yonatã yà ì Dauda nɔɔfi a djiini ì kè: Baaba, m̀ba vānike n zɔkɛda Daudaniba, zaaka ici yã vāni kan ke'nniba. Ì fɔkenaa lafanaa zɔ'nni nɔɔnɔɔ. Ka ì Filishitini ginaa dè, ì jè ì hundiiji, ye Zɔnadi tù wo dɛbu ashi bì wo pai. N wà, ye n zūn kè nda. Boyāaji n̄ waaji n̄ vānike taalibadi ginaani n̄ ì de kakaji? Saulu ì yã mà, ye ì ladà ì kè: Kũni Zɔnadizɔ wòba ì deaba. Ì gbɛji

Yonatã Dauda shìshi ì yã ginaa deedeekè'ini pai, ye ì yà kūni Daudazɔ Saulu gu, ye ì bii'izɔ du yãazɔ.

Dēbuu cēē ì kpètē, ye Dauda yà dēbuukeēji kūni Filishitininazɔ. Ì gè'alu ì dēbuubi'ama bugubugu, ye à bash'ini.

Zɔnadi tù Saulu jì za ginaa cēē ì shìa lootoo ka ì àcē a koru. Ì a shingii kù, ye Dauda bi ì kwansa dea'ini. Saulu tǝ ina Dauda fazɔ ina ì dakū kūni tātāazɔ. Ka ì ɔdèni, ye shingi ginaa kpē tātāa fà.

Gāɔni bēē Dauda bashì ì yà. Ye Saulu gūna dē Dauda wei àna ì dādā, àna ì de saraazɔ, ye ì ne Mikali ì ì gbà laakali ì kè: Nnaaci bashi gāɔniba, wò n dea lefū. Ye Dauda bò forolu, Mikali ì ì dà kūni bēezɔ cēē, ye ì bashì ì dò jerema. Ye Mikali ji'ako shìtē ì wùcē wucebɔɔma, ì bui shēē shìtē ì kà ji'ako ginaa miima, ye ì bisheē tātama. Ka Saulu gūna dē Dauda kūuji, Mikali kè ibi gedēa. Ye Saulu cēē ì gūna dē waadɔɔji Daudaji, ì fi'ani: À ì shìtē kūni ì wucebɔɔzɔ ledulē, à ci'izɔmani mà ì dē. Ka à gē koru, ji'ako ginaa à wà wucebɔɔma, bui shēē bii ì miima. Ye Saulu Mikali làlu ì kè: Bɔyāaji n bò ma gbēji n ma jedi dà ì pitokèmani laale? Mikali wì'ini ì kè: Ì fimani mà tu a gitaa, Mana jè, a ma dea.

Ka Dauda bashì ì dò jerema, ì yà Sama'ila waaji Lama. Yã ka Saulu kè'ini ì deedeekè'ini pai, ye à yà à àcē Nayoto ledulē. Ka wò fi Sauluni, Dauda bii Nayoto Lama, ye Saulu gūna dē àna ì kū. Ka à bùru gubē, à lì annabi gandu gūna bi annabikeēkea, Sama'ila dùcē à gu à watalu. Ye Ladu Nanii dì mɔzɔnanɔni, àbi annabikeēkea kīn. Ka wò fi Sauluni, ye ì gūkena dē, ye à

annabikeekè laale mɔɔ. Saulu cɛɛ ì gūna dɛ̀ tara adibi, ye à annabikeekè laale mɔɔ. Ye Saulu kpɛ̀te ibi yaa Lama a ginda beɛ. Ka ì bùru izo ashi kutu ka bii Sheku, ì gūna làlu ì kè: Sama'ila kūni Daudazo bii maami? Ye wò fl'ini: À bii Nayoto Lama. Ka ibi yaa gube, ye Ladu Nanii kà'ima kīn, ibi yaa, ibi annabikeekèa hari ì bùru Nayoto Lama. Ì a asuna bɔ̀'ama, ì annabikeekè Sama'ila wadajīn. Looto beɛ emena kūni gāonizo pai ì bii wucena huntu. Ì yāaji ye tù wòta ke: Saulu bii annabinalu kīn dee?

Dauda kūni Yonatāzo

Dauda bɔ̀ Nayoto Lama ì bashì ì yà ì Yonatā lì, ye ì ì làlu ì kè: Bó ye ma kè? Dà kpaci ye ma kè? Vānike kpaci ye ma kè n djiini ye ibi tōa ina ma de? Ì wì'ini ì kè: Gyam! M̄ba gaaba. Wa, ma djii bata fɔkan ke ici ka ma tɔnɔluba, yā ashi koo yā jīn. Ma djii ba yā beɛ taka kea ina je fiijimani dee? Ba laaleba! Ye Dauda fī mɔɔ: N djii dɔ̀ shāashā n ma wɛɛ wà. Ì yāaji ici tu n yā ginaa m̄ba, dun m̄ba zūncirikeba. Kūni Zonadi biinaazo kūni n biinaazo má bii gaa lema. Ye Yonatā fl'ini: Yā ka n wotukɛmama pai má kea'nni. Ye Dauda fl'ini: Wa, mɔ dɛɛɛ buki bii lefū. Ì kù mà ace mà fɔbi kūni kirizo. Tu mà yaa mà dudu lahoolu hari lefūnaagū itoɔke. N djii nà ma yā lalu, fl'ini ma jere làlu'mma ma yà ma wei faralu Baitalami fudaa musu, dun sāma ka wòta ke wɛɛ kūni wɛɛzo ma weigūna bi kea gube pai. Ina kè ì nɔɔmi, magūa baani, amaa ì zūn nà fà nɔɔɔɔ, ì dɔ ka fɔ vāni ye ì bòwi ina kɛmani. Gucekɛɛ ke mani

n zɔkedani, zaaka n lekɛdukɛmazɔ kũni Zɔnadi dɔ̃naazɔ. Manaa taali zɔ, ñ ma de n ginda. M̃ba ma kpa n djiiniba. Ye Yonatã kè: Gyam! Mana dɔ̃ ma djii bòwi ina vānike'nni, mába fia'nniba dee? Ye Dauda ì ì làlu ì kè: N djii nà yā zaa fi'nni, dí ye fiamani? Ye Yonatã fi'ini: Nu wò yaa lahoolu. Ye à bò à yà lahoolu à gũ fia.

Ye Yonatã kè: Kũni Zɔnadi Isra'ilana Laduzɔ, hari lefũnaagũ mɔkalaale má ma djii yɔ̃a mà wà. N yā nà kea'ini nda, má lekpellegea'nni. Ma djii nàa waaji a vānike'nni, mɔnɔ maci lekpellege'nni ma n tù n yà baaniba, Zɔnadi yā zaa kemani vānivāni. Zɔnadi bii'nzɔ laaka ì bii kũni ma djiizɔ yāa. Manaa bii hundiizɔ, gucekeekemani laaka Zɔnadi tà ke. Mana gà kīn, n winaa ba inceã kũni ma wei gūnazɔ dikamba, baa ka Zɔnadi tù n iberena ìnce dunialu. Laale Yonatã lekɛdukɛ kũni Daudazɔ, ye ì kè: Zɔnadi findebu n jedinani. Ye Yonatã tù Dauda cɛ̃e ì ì ladà'ani mɔnɔ dun ì waa'iji, zaaka ì waa'iji du a gindazɔ.

Ye Yonatã fi'ini: Mɔ deree buki bii lefũ. Wonaaci gũkan wa n guruluba, wò n lalua. Lefũnaagũ yaa ñ dudugu ka n dùdu yā ginaa farashinadi, ñgũ bii taragberɛ kutu gube. Má kɔɔ zua gbere ginaa kutu were à, laaka mabi zua fɔma, má nigõni kee dɛ̃a ina yaa ina kɔnanzɔ tɔ̃. Mana fi'ini, kɔna bii ì gbɛ̃ji, ina shite ina nuzɔ, nu, zaaka kũni Zɔnadizɔ ngũa baani, hasali ba biiba. Mana fi'nni kɔna bii ì watalu kīn, yaa, zaaka Zɔnadi ye n dà. Wo le ka kè duu kīn, Zɔnadi ye gũa bii ì sheedukɛda dipai.

Ye Dauda yà ì dùdu lahoolu. Ka mọ deree bọ, kiri àcẹ ina fọbi. Ì àcẹ ì gurulu kpe tātāa kutu. Yonatā àcẹ ì watalu, mọno Abineẹ bii Saulu kutu. Dauda acegu kīn, gūkan ba bii gubeba. Saulu ci yākan fi dibeediba, zaaka ibi waa yākee ye ì lị, ì gbācikè. Ka di kẹ mọ di fiadibi, Dauda acegu bii honko, ye Saulu ì ni làlu ì kẹ: Bọyāaji Yeshe ni ci nu fọbiiji zaa gumaba? Ye ì kẹ'ini: Ì jere wotukēmama, ì yà Baitalami. Ì kẹ mà tu a yaa, zaaka a wei gūna bi sāmaka faraginalu, ye a bakere fi'ani a nu. Ì kẹ ina kẹmani nda, mà a tu a yaa a bakerena waaji. Ì yāaji ye tū ici nu fọbiiji'nzoba. Ye Saulu zūn fà Yonatāji ì kẹ: Ni fayabadi tōnōgbādanadi! Ma dō n dūcẹ kūni Yeshe nizō. N unikà n gindama kūni n dōzō. Yeshe ni ginanaa bii hundiilu, mba kirikeaba. Gūna dē àna ì kū àna ci'izōmani bece. Ì gaami. Ye Yonatā ì làlu ì kẹ: Bọyāaji ye ì gaa? Bó ye ì kẹ? Ye Saulu shingii zù'ima ina ì dē, ye Yonatā dō bece a djii dūcẹ kūni Dauda denaazō.

Yonatā kpète ì bọ fọbinaama kūni zūmfanaazō, ici fọbi mọ di fiadibi ginaba, zaaka ì zūn wùri Dauda yā musu, dun ì djii ì ì kpebò.

Ka di kẹ, Yonatā bọ ì yà Dauda liiji gu ginalu. Jingi jīn kee dō'ima. Ye ì fi ni ginani. Bashi ì yaa gulele. Má kọ zua, ì tō. Ka ni ginaba bashi ibi yaa, ye Yonatā kọ zù ì miima. Ka ni ginaba bùru gu ginalu ka Yonatā kọ zù, ye ì lezù ni ginaji ì kẹ: Kọnana bii n watalu gulele. Ye Yonatā cẹ ì lezù'iji mọno ì kẹ: Yaa kyāakyā, mba duceba. Ye ni ginaba kọnana shite ì cizō

ì zɔnadini. Ni ginaa ci fɔkan dɔ̃ba, sai Yonatã kũni Daudazɔ. Ye Yonatã ì ì dẽkebɔna kpà ni ginaani ì kè: Shi ò yaazɔ kpe.

Ka ni ginaa yà, Dauda kpète gberɛ ginaa barugu ɔ̃ji, ì nù ì kùce Yonatãni tara à, ì wùce a gberɛema. Ye à lɛkà kũma, à ù à gũ fia pai, Dauda mu ye gbãa. Ye Yonatã fi'ini: Yaa baani, zaaka wo ladà kũni Zɔnadi tɔzɔ wo kè, Zɔnadi wo sheedukɛda ma bena kũni n benazɔ buden hari dipai. Dauda bɔ gube, ye Yonatã cẽe ì yà kpe.

Sama'ila takada fiadibi

Dauda Saulu gaa baalu manaa

Saulu gaa gbɛ̃ji Dauda cì kũni Amalɛkina kakacenaazɔ, ye ì gbɛ̃egũ Jikilaga di fia. Di adibi nigɔ̃ni kee bɔ Saulu gaalu ì nù. Ì asuna bii kasukasuna, mɔnɔ cɛɛ'ãatɛ bii kana ì miima. Ka ì nù Dauda gu, ì kùce'ini ì wùce ì gberɛema. Dauda ì ì làlu ì kè: N bɔ maami? Ì wì'ini ì kè: Ma bɔ Isra'ilana gaalu. Ye Dauda ì làlu mɔnɔ: Ì ke laala gube? Fimani. Ye ì wì'ini ì kè: Isra'ilana bɔ dẽbugu à bashi. À gũ gbãa sùte à gàga. Saulu kũni ì ni Yonatãzɔ gà mɔnɔ. Ye jingi ka bi baalu ginaa kpaa Daudani, Dauda ì ì làlu ì kè: Laala ye n dɔ̃ Saulu kũni ì ni Yonatãzɔ gà? Ì wì'ini ì kè: Ì nù ì lì má bii Giliboa kasa tãtãama gube, ye ma Saulu wà, ibi gbãdaa lia ì shingiima. Bisagurunadina kũni bisanadinazɔ bi nua'izɔ kutu. Ì sòri ma ɔ̃ji, ì ma wà, ye ì ma

shìshi. Ma kè: Maa le! Ye ì ma làlu, manimi di? Ye ma wì'ini Amaleki beemi mani. Ye ì fìmani mà nu a gu, mà a de, zaaka guu bi lilia'azɔ, baa ka a were bii guna. Ye ma nù ì gu ma ì dè, zaaka ma dǒ iba fǝa ina baani li ì zǝna ginaa gběji mɔnɔba. Ye ma ì kirikefula shìte ka ì kà kǔni ɔzāazɔ ka ì kà, ye ma nùzɔ n gu lè ma zɔnadi. Ye Dauda ì asuna gàra ì kàsu, ye gǔna ka bii'izɔ à à mu kàsu kǐn. À Saulu kǔni ì ni Yonatāzɔ ga'unaakè kǔni Zɔnadi gǔ Isra'ılanazɔ, zaaka dēbuu ì à bì. À were'ibò, ye à le'iri hari itɔke.

Jingi ka baalu ginaa kpà Daudani Dauda ì ì làlu ì kè: N wei bii maa? Ye ì kè'ini: Niba nimi mani, Amaleki bee. Ye Dauda ì ì làlu ì kè: Ì kè laala kiri ka Zɔnadi kà denaa wohu ci n kǔba? Ye Dauda jingikee shìshi ì kè: Ñ ì anga n ì dè kǐn. Ye ì ì angà ì ì dè. Ye Dauda kè: N n ginda dè, zaaka n ginda le ye n kà yǎlu, n kè kiri ka Zɔnadi kà n dè.

Indawere lee ka Dauda shì Saulu kǔni Yonatāzɔ gaa musu

Dauda indawere lè lee shì Saulu kǔni ì ni Yonatāzɔ gaa musu. Ì kè wò lè ginaa dada Yahudanani. Ì bii Gǔ Nɔɔna takadalɔ.

Isra'ila darajanadina gàga kasatātāama,
gǔ gbādana iwerekè fa!
Àba ì baalu kpa Gata kacerenaluba,
dun Filishitini negūna naba ì zǔn ndaa kēba.
Àba ì kasheedika Ashekeloniba,
dun bangubadi ni negūna naba zǔn ndaa kēba.

Fíri naba kpa Giliboa kasaama mɔ́nɔ́ba,
laa naba bā jenama ka bii gube mɔ́nɔ́ba.
Gube wò gū gbādana lɛbɔɔ kpebò,
yɔ́nɔ́dɔ́kɔ́na Saulu lɛbɔɔma lɛ bùru!
Wònaabi gū gbādana ama futēa,
wònaabi à gberɛɛ jēa,
kɔ́zuda gbādaa Yonatā bata cēɛ gbējiba,
takubanadi gbādaa Saulu bata ci kakajiba.
Saulu kūni Yonatāzɔ,
gūpai waa'àji, amanadinami.
Àci kata kūma hundii koo gaaluba.
À fudakɛɛ kpà dunla,
à gbādaa kpà musu'ashila.
Isra'ila negūna,
à were'ibɔ Saulu gaa musu.
Ì a kà bishe tē dɔ́naaji kūni zākeɔ́nɔ́zɔ,
ì sabu a asuna nɔ́ɔna kà kūni wula zānɔ́zɔ.
Gū gbādana iwerekè dēbugu fa!
Wò Yonatā dè kūni takubazɔ kasa tātāama.
Ma gū Yonatā,
ma gbèɛgū irina n yāaji,
n nɔ́ɔmanì wasawasa.
N winamaji ba saara zɔ́ba,
ì kpà negū winaala.
Gū gbādana iwerekè fa!
À dēkeɔ́na kàkacɛ.

Dauda kana Yahuda kirikeelu

Bee gbēji Dauda Zonadi lālu ì kè: Mā yaa Yahuda faralua? Zonadi fi'ini ina yaa, ye Dauda cēē ì ì lālu ì kè: Maa ye mā yaa? Zonadi wì'ini ì kè: Heberōni. Ye Dauda yà gube kūni ì ne fiaazo, Jezereli gū Ahinoamu kūni Nabala gyāa Abigaili, Kaameli gūzo. Dauda yà kūni gū ka bii'izo mōno, gūpai kūni a wei gūnazo, ye à àce Heberōni kūni ì fara jīnnazo. Ye Yahudana guce ashina nù à yōno kà Dauda miima gube, à ì kà Yahudana kiri.

Ka Dauda mā Yabeshi Giliada gūna ye Saulu vīri, ì gūna dē'ama, à fi'ani: Zonadi nà albalikaka'ani! A gucekeekè Saulu a zōnadini, a ì vīri. Zonadi nà nookee kūni yādaazo ke'ani, dun a yā ginaa kè. À zūngbādaake à duce gbāda. A zōnadi Saulu gā, ye Yahudana ma kà à kiri.

Nee ni Abinee, Saulu dēbukedana watalu yà kūni Saulu ni Ishiboshezō Mahanaimu. Ye ì ì kà kiri Giliada cerelu kūni Ashiru bena cerezo kūni Yezēelizo kūni Efaraimu bena cerezo kūni Biliaminu bena cerezo kūni Isra'ila cere kutunazo pai. Saulu ni Ishiboshe wē keefiadibi ì gbēegū Isra'ilana kiri. Ì kirikè wē fia. Yahudana kīn, Dauda ye à dūce'izo. Daudami Yahudana kiri Heberōni hari wē sōfia kūni mō sōduuzo.

Isra'ilana dēbukena kūni Yahudanazo

Nee ni Abinee kūni Saulu ni Ishiboshe dēbukedanazo bō Mahanaimu à yà Gibēo. Jeruya ni Yoabu kūni Dauda

dēbukedanazo kpète à yà daaji'àle Gibēo idigu kutu. À gandu duu bii ile lēema, duu bii i baaji. Ye Abineē fi Yoabuni: Tu jingina nà kpete àna kukūkwoni. Ye Yoabu kè: À yaa. Ye Biliaminu dēbukedana kpète koori awerefiazo Ishiboshe mu, ye Dauda dēbukedana kpète koori awerefiazo kīn. Gūpai ɔkà ì gaabanadi kpakoji, ye à kū ẓẓ kū tātāama kūni fēneẓ, à sùte ledule. Ye wò tɔkà Gibēo gu ginaani Fēnena Jefuu. Dēbuu ka wò kè di bee za nɔnɔ, ye Dauda dēbukedana dēbuubi Abineē kūni Isra'ilanama.

Jeruya nigōni gū à bii gube, Yoabu kūni Abisaizo kūni Asahelizo. Asaheli kīn, ì baa zo du kpizāzo. Ye ì dō Abineēma, ici sori ɔbiceēma koo ɔjengeemaba. Ka Abineē ì waadò ì gbējiji, ì ì wà, ye ì kè: Asaheli, nni ye gubea? Ì w'ini ì kè: Manimi. Ye Abineē fi'ini: Sori ɔbiceēma koo ɔjengeēma, n jingi jīn kee kū n ì fona shi'ima. Amaa Asaheli ci ì dōnaa tuba. Abineē cēē ì fi'ini mɔnɔ ì kè: Mba dōmamaba. N waaji mà n decea? Mana n dē, má were kea shi kūni n bakere Yoabuzo mɔnɔ dee? Amaa Asaheli jè, ici ì dōnaa tuba, ye Abineē ì ì ẓ ì gberēema kūni ì shingi bazo hari ì bō gbēji. Gube ì sùte ì gà, ici susunkeba. Ka gūpai bùru gu ginaalu ka ì sùte ì gà, à dùce cip.

Ye Yoabu kūni Abisaizo dō Abineē gbēema hari usō sùte. À bùru Ama kasaa guu ka bō kūma kūni Giazō Gibēo gangani jere kutu. Biliaminu bena dākū Abineēma gandu du, ye à yà àbi jea kūni a gindazo kasaa miima. Ye Abineē lezù Yoabuji ì kè: Wóba ducea kū dēdenaanaiba dee? Mba dōa ka yā ginaa inceā kūni musaizoba dee? Mba fia n gūnani àna wo dōnaa tu

àna cẽe àna yaabaa? Ye Yoabu wì'ini ì kè: Ladu bii! Nnaaci yāfi yāaba, ma gūna ba a dōnaa tuaba hari di nà kē. Ka Yoabu kuru fē, ye ì gūna ùsā, àci yaa Isra'ilanama kūni dēbuuzo mōnōba.

Gāoni bēe Abineē kūni ì gūnazo yà lahoolu, à bùra Urudūma, ye à gītaa baje'ereema hari à bùru Mahanaimu. Ka Yoabu cì kūni dōna Abineēmazo, ye ì ì dēbukedana dākū pai. Dauda gūnalu gū koori aweresooshizo ye ba biiba, Asaheli baashi. Biliaminuna ka bii kūni Abineēzo à à dède gū keesoru à a kee'azo (360) À Asaheli gee shìte à vīri ì djii gberē'ereelu Baitalami. Ye Yoabu kūni ì gūnazo tà gāoni, dikēna ye à bùru Heberōni.

Dēbuu ka Saulu wei gūna kè kūni Dauda wei gūnazo geekè. Dauda gbādaa bi lafaa, Saulu wei gūna kīn, à gbādaa bi labua.

Dauda ni nigōnina

Ni nigōnina ka Dauda ì Heberōni tōn lè: Farashina tōmi Aminō, ì dōw tōmi Ahinōamu, Jezereli gūmi. Fiadibi tōmi Kilēabu, ì dōw tōmi Abigaili, Nabala gyāa, Kaameli gūmi. Adibi tōmi Abisalomu, ì dōw tōmi Maaka, Gesuru kiri Talamai nimi. Shidibi tōmi Adonia, ì dōw tōmi Hagita. Sōwudibi tōmi Shefatia, ì dōw tōmi Abitali. Sōwududibi tōmi Iteamu, ì dōw tōmi Egela. Dauda nēna ninanō ì Heberōni.

Abinee nana Daudama

Lootoo ka Saulu wei gūna bi dēbuukea kūni Dauda wei gūnazɔ, Abinee bi gbādakūa Saulu wei gūnalɔ. Saulu wahai zɔ yāa, ì tɔmi Lizipa, Aya nimi. Ishiboshe fi Abineeni: Bɔyāaji n wùce kūni ma djii wahaizɔ? Abinee zūn fà nɔɔnɔɔ Ishiboshe yā ginaa yāaji ì kè: Yahudana gbē miimi mania? Mabi gucekeke n djii Saulu weigūnani kūni ì dakunazɔ kūni ì tɔnazɔ hari bece. Maci n na Dauda ɔluba, ye mbi ma taaliwaa negū ginaa yā musu becea? Alkawali ka Zɔnadi kè Daudani, manaaba kea'iniba, Ladu nà yā zaa kemani vānivāni. Ani Saulu wei gūna, má kirikee shia'ama, má tua Dauda nà gbēgū Isra'ilana kūni Yahudanazɔ kiri zaa Dā hari ì yà Bēsheba. Ishiboshe ci fī ina yāci Abineeni mɔnɔba, dun ibi wohuma'inia.

Abinee gūna dē Daudama kūni ì tɔzɔ ì kè'ini: Dí ye cere zɔ? Wò lekeduke, má ɔkaa'nni, dun Isra'ilana nà na'mma à pai. Ye Dauda kè: Ì nɔɔ, má lekedukea'nzɔ, amaa yā guda duu mabi lalua'mma. Nnaabi nua má waaji, nnaaci numani kūni Saulu ni negū Mikalizɔba, mba tu wo wereshiike kūzɔba. Dauda lekpellekè Saulu ni Ishibosheni ì kè: Ì ma nē Mikali cēemani. Ma mirakè kūni Filishitinina bangunazɔ guda keesɔru. Ye Ishiboshe gūna dē, à negū ginaa shì ì zā Patieli, Laishi nima. Ye ì zā ginaa bi yaa'izɔ, ì dɔ'ima hari Bahurimu, ibi ua. Ye Abinee fi'ini ina cēe ina yaa, ye ì yà.

Abinee yāfi kūni Isra'ila guce ashinazɔ ì kè: Zaa yāa ábi tōa Dauda nagū bii a kiri. À ì ka bece, zaaka Zɔnadi alkawalikè'ini ì kè a a gū Isra'ilana bɔa Filishitinina kūni à iberenazɔ pai ɔlu

a zəkeda Dauda sabu. Abineε yā ginaa fi Biliaminu benani à tōnoma mōnō. Ye ì yà Heberōni yā ginaa ka kè Biliaminu bena kūni Isra'ilanazōni nda fiiji Daudani. Ka ì bùru Dauda gu Heberōni kūni gūnazō keedu ka bii'azō, ye Dauda gaara kè'àni. Ye Abineε fi Daudani: Ma zōnadi kiri, tu mà kpete mà yaa Isra'ilana dakū'nni pai, dun àna lekēduke'nzō, ngūa kirikea cerema ka n zūn waaji pai kiri. Ye Dauda Abineε dà, ibi yaa baani.

Yoabu Abineε denaa

Dibēedi Yoabu kūni Dauda gūnazō cì kūni hēna'àmazō. À fōna shì gūnama nōnōnō à cìzō. Abineε ba bii kūni Daudazō gube mōnōba, zaaka ì ì dà, ibi yaa baani. Ka Yoabu kūni dēbukēdanazō ka bii'izō bùru, wò fi'ini Nē ni Abineε nù kiri waaji, ye ì ì dà ì yà baani. Ye Yoabu yà ì kiri lì ì kè: Bó ye n kè laale? Ka Abineε nù n gu, bōyāaji n tù ì yà? Nci Nē ni Abineε dōba dee? Ì nù azancikeji'nni, dun ina n yadi kūni n cidizō dō kūni n yākenazō pai. Ka Yoabu bō Dauda gu, ye ì gūna dē à dō Abineema. À ì lì Shira izō gu, ye àbi cia'izō, amaa Dauda ci ì yā dōba. Ka wò bùru kūni Abineεzō Heberōni fara lema, ye Yoabu ì shishi laaka ì waaji a yāfi'izō à din, ye ì ì zō ì gberema ì ì dē. Ì daku dena findee ye ì bù'ima.

Bē gbēji ka Dauda mà, ì kè: Mani kūni ma kirikeεzō, maba taali zō Zōnadini Nē ni Abineε dena yā musuba. Yā ginaa wia Yoabu musu kūni ì djii wei gūnazō pai. Nenagenadi nagū bii Yoabu wei gūnalū dipai koo kuturu koo erē koo gū ka dēbuu ì

bì koo nɔmada. Yoabu kùni Abisaizɔ ye Abinee dè, dun ini ye à daku Asaheli dè dēbugu Gibēɔ. Ye Dauda fi Yoabuni kùni gūnazɔ ka bii'izɔ pai: À a asuna gara à kasu, à zagarana kaka'ama, à ke Abinee geeni watalu kùni unaazɔ. Kiri Dauda ye dɔ ge ginaama. Ye wò ì v̄iri Heberɔni. Kiri ù, ì kuaadà Abinee kasama, ye gūpai ù kīn. Ye kiri indawere lè lɛɛ shì Abinee musu ì kè:

Abinee ganaa du azancibadizɔ nɔɔn bea?

Wòci ì ɔ iriba, wòci kacikaci ke'iniba,

ye ì gà du gūzɔ ka sùte fɔvānikedana ɔlu.

Ye gūpai c̄ɛ à ù mɔɔɔ. Gūpai nù à fi Daudani ina fɔbi hari gu ciria, amaa ì ladà ì kè: Mana burodi koo fɔkɛɛ ka ma lɛma us̄sutena badi, Ladu nà yā zaa kɛmani vānivāni. Gūpai weret̄ɛ yā ginaama, ye ì kè'àni nɔɔ. Yā ka kiri bi kɛa pai ita ke gūnani nɔɔ. Looto bɛɛ Dauda gūna kùni Isra'ilanazɔ pai à d̄ɔ beɛɛ kiri lɛ ba bii Nɛɛ ni Abinee dɛna yāluba. Ye ì fi ì gūnanɔni: Aci d̄ɔ ka Isra'ila watalu guɛɛ ashi gà ceceba dee? Mani kīn, baa ka Ladu ma kà kiri, ma bùsā cece. Jeruya ninanɔ fɔkɛna gbādaa ì kpà ma mula. Zɔnadi ye findebua vānikedani.

Ishiboshe ganaa

Ka Saulu ni Ishiboshe mà Abinee gà Heberɔni, ì duwere gàga, mɔɔɔ Isra'ilana gbèegū bitilu à pai. Saulu ni ginaa dēbukeda wataluna zɔ fia, duu tɔmi Baana, duu kīn Lekabu. Beelo gū

Limɔ, Biliaminu bee ninami. Wò Beelo dì Biliaminu mu yāa, zaaka Beelo gūna bashì à yà Gitaimu, à bii gube hari bece. Saulu ni Yonatã kīn ì ni zɔ ɛɛɛ. Lootoo ka ni ginaa bùru wɛ̃ sɔɔru, ye Saulu kūni Yonatãzɔ ganaa Jezereɓi baalu cì. Ka ì toroda ì shìte, ibi bashia'izɔ, ì fudakenaalu ni ginaa fùru'ima ì sùte. Bee ye tù ì kè ɛɛɛ. Ì tɔmi Mefiboshe.

Beelo gū Limɔ ninanɔ Lekabu kūni Baanazɔ à kpète, usɔ̃cīn à bùru Ishiboshe wei, lootoo ka ibi emena iwere kea. Ye Lekabu kūni ì daku Baanazɔ gɛ̃̃ koru, à kè du gūnazɔ ka bi yaa fɔwere kishiiji. Ka à gɛ̃̃ koru, Ishiboshe bii wucena ì wucebɔɔma, ye à gɛ̃̃'iji igulu, à ì zɔ̃ à ì dè. Ye à ì mii jè à shìte à yàzɔ. À gɛ̃̃ Urudū lahoolu, ye à tàlu hari di kè. À nù Dauda gu Heberɔni kūni Ishiboshe miizɔ à f'ini: Wa, n jedi Saulu ka tɔ̃ ina n de ni Ishiboshe miin lè. Wo zɔnadi kiri, Zɔnadi findebù'nni Saulu kūni ì benama cece. Dauda wì'àni ì kè: Zɔnadi bii! Ì ma bò ma taabikenaalu pai. Ka gūkee nù ma gu Jikilaga yāa ì kè Saulu gà, ibi waa baalu nɔɔ abi kpaa, ye ma ì kù ma ì dè. Ì baalu laadan be. Bale laaka ani gū vānina a taalibadi dè ì wucebɔɔma ì koru, má ì dena findebua'ama mà a hundii bɔ. Ye Dauda yāfi ì jingi ibanani, ye à à dède. À à ɔtaahina kūni à gbetaahinazɔ jèjè, ye à à gena kɔtɔkè Heberɔni itɔgu kutu. Ye wò Ishiboshe mii shìte wò vīri Abinee kasalu Heberɔni.

Dauda kana Isra'ilana kirikeelu

Isra'ilana nù à beema pai Dauda gu Heberɔni à kè: Wo ama dumi. Zaa yāa lootoo ka Saulu bii wo kiri, nni ye tà kewoni

watalu dēbugu, yanaa kūni cinaazɔ. Ye Zɔnadi fi'nni nni ye gūa bii a gū Isra'ilana watalu, à kiri. Ka Isra'ila guce ashina nù kiri Dauda gu Heberɔni pai, gube à lekɛdukè'azɔ Zɔnadi watalu, ye à yōnɔ kà ì miima, à ì kà Isra'ilana kirikeɛlu. Dauda wè kedokoori ye ì kirikè, ì kè kirike ginaalu wè keefia. Ì bii Yahudana kiri Heberɔni wè sɔɔfia kūni mɔ sɔɔduuzɔ, ye ì bii Yahudana kūni Isra'ilanazɔ pai kiri Urusalima wè kedokoori aware'azɔ.

Kiri kūni ì gūnazɔ gè Urusalima àna dēbuuke kūni Yebushinazɔ ka bii gube. Ye à fi Daudani: M̐ba gēa guleba, baa vīana kūni ɛrenazɔ à n kekea. Àbi waa Dauda ba gēa gubeba. Amaa fara bīnninadi ka wòta ke mɔnɔ Shiona Dauda shì, ye ì gbèɛgū Dauda fara. Looto bɛɛ Dauda kè: Gū nàa waaji a Yebushina dede, sai ina gē ijere ka wò kòrɔ gbereɛlu, ina ɛrena kūni vīananɔzɔ li. Dauda jedinani. Ì yāaji wòta ke vīana kūni ɛrenazɔ ba gēa kiri kwaaceluba. Ye Dauda wei gifa fara bīnninadi ginaalu, ì a ginda tɔkà'ini Dauda Fara. Ì kpɛna bùbu ì lika zaa guu ka wò èrɛɛ tàta wòta ke Milo hari ì lu. Dauda gbādaa bi lafaa, zaaka Zɔnadi Ladu Dēbunadi bii'izɔ.

Taya kiri Hiramū gūna dè Daudama kūni ciba akɔnazɔ kūni shekenazɔ kūni gbere shekpadanazɔ, ye à kpɛ bù'ini. Ye Dauda dè bece ka Zɔnadi a kà Isra'ilana kiri, mɔnɔ ì a kirikeɛ lafà'ani, dun Isra'ilanami Zɔnadi gūna.

Dauda bɔna Heberɔni gbēji ì cèɛ ì ne kena shì Urusalima mɔnɔ kūni wahainazɔ, ye ì ni nigōnina kūni ni nɛgūnazɔ ì'azɔ. Ni

nigõninano ka ì à ì Urusalima tòn lè: Samua, Sobabu, Natana, Sulemanu, Ibaa, Elisua, Nefegi, Yafia, Elisama, Eliada, Elifele.

Ka Filishitinina mà wò Dauda kà Isra'ilana kiri, ye à yà àbi ì tãa à pai. Ka ì à baalu mà, ye ì yà ganganilu. Filishitinina dēbu'wɔfuru Lefai guwucenaalu, ye Dauda zɔnadi lálu ì kè: Mana yaa fɛɛji Filishitininama, n̄ à naa ma wɔlua? Ye Zɔnadi wì'ini ì kè: Yaa, má à naa n wɔlu. Ye Dauda yà Baali Perajimu, ì dēbuubi'àma gube. Ye ì kè: Zɔnadi kèmani watalu, ì bò ì nù ma jedinama kūni gbādaazɔ, laaka í tà guu fɔ buii. Ye ì tɔkà gu ginaani Baali Perajimu. Filishitinina à à jina tù gube, ye Dauda kūni ì gūnazɔ à shìte à yàzɔ.

Filishitinina cɛɛ à nù mɔnɔ à dēbu'wɔfuru Lefai guwucenaalu. Ye Dauda cɛɛ ì Zɔnadi lálu mɔnɔ. Ye Zɔnadi wì'ini ì kè: M̄ba yaa'àma suusuba. À lika à bɔ à gbɛ̄ji, n̄ fɛ̄'àma gbɛ̄ne akɔkpe kutu. Ana tana kɔsɔngu mà akɔnano miima, à kè kyāakyāa, zaaka mani ye bɔa mà gɛ̄'ani watalu gube, dun mà dēbuubi'ani Filishitini dēbudanama. Dauda kè laale laaka Zɔnadi fì'ini, ye ì dēbuubi Filishitininama zaa Gibɛ̄o hari ì yà Gejeema.

Cina kūni Zɔnadi adakaazɔ Urusalima

Dauda cɛɛ ì Isra'ila dēbukɛda nɔɔna dàkū dubu kedokoori (30,000). Ye ì kpɛ̄te ì dɔ̀'azɔ jerema, à yà Baala ka bii Yahuda cerelu, dun àna Ladu adakaa shite àna cizɔ. Zɔnadi Dēbunadi tagū bii acena kiri adaka ginaa musu mala'ika shīnnadina buden, ye wòta ke ì tɔ biima. À adaka ginaa kà diguru dereelu

kè Zɔnadi watalu kŭni saabukebɔɔzɔ. Ka ì sāmakè ì ìnce, ì gara nɔɔ fì gŭnani kŭni Zɔnadi Dēbunadi tɔzɔ. Ye ì burodi gbìri Isra'ilanani ka dākŭ gube duuduu nigŭnina kŭni negŭnazo pai kŭni dabino karaazo duuduu kŭni inabi ni karaazo duuduu.

Ka Dauda bi yaa gara nɔɔ fiiji ì weigŭnani, ye Saulu ni Mikali bɔ ì yà daaji'ile ì kè: Nni Isra'ilana kiri, n kè darajanadi gube cecea? N n ginda duwere mɔ n ibana negŭ zɔkedanani, laaka unibadi tà ì ginda duwere mɔ'ani. Ye Dauda fì Mikalini: Zɔnadi ye ma bèbe'ini. Zɔnadi ye ma bɔwi n djii kŭni ì wei gŭnazo gurubi, ì ma dī ì gŭ Isra'ilana watalu. Má kea futa ì kpà beela, má ma ginda labua'nni n wanaalu, amaa negŭ zɔkedanano ka n à yā fì àni ye ma marekɛɛ dɔa. Ye Saulu ni Mikali ci ni'iba hari ì gà.

Ladu alkawalikena Daudani

Ka kiri àce ì wei, Zɔnadi ì bɔ jedina ɔɔlu ka līka'iji, ì ì gbà utumigu, ye kiri fì annabi Natanani: A'a! Kpe ka wò bù kŭni ciba akɔzɔ ye má acealu, Ladu adakaa gŭa bii bishɛkpɛlua? Natana w'ini ì kè: Laaka ì bii n zŭnlu ò kè, zaaka Zɔnadi bii'nzɔ. Gāɔni bee Zɔnadi yāfì Natanani ì kè: Yaa ò fi ma zɔkɛda Daudani ma kè, kpe ka magŭa biilu, ba ini ye buamaniba. Zaa lootoo ka ma Isra'ilana bɔ Masar hari cece maci kwaace gifaba. Mata suate kpaakpaa, bishekpemi ma biigu. Guu ka ma sùate kpaakpaa kŭni ma gŭ Isra'ilanazo pai mata wataluna di àna ke'àni watalu, amaa maci fi à gŭkanni, bɔyāaji ici kpe bumani kŭni ciba akɔzɔba. Yaa ò fi ma zɔkɛda

Daudani, mani Zɔnadi Dēbunadi ma kè, ma ì shì kurukɛgu, dun inagū bii ma gū Isra'ilana watalu. Ma bii'izɔ guu ka ì yà pai, ye ma ì iberena dèdè'ini. Má tua ì tɔ nà bò nɔnɔnɔ beɛɛ, igūa bii dunia tɔnadina duu. Má cere kpaa ma gū Isra'ilanani, má à kaalu, àna acelu à mu. À zūn ba bebea mɔnɔba. Gū vānina ba à weretēɛkea laaka à à weretēɛkè farashina lootoo ka ma wataluna dī'ani mɔnɔba. Má ì boa ì jedinanɔ ɔɔlu pai.

Mani Zɔnadi mabi fia'ini, mani ye kwaace kpaa'ini ì bena gbādaliguu. Ì di nà fà, ì gà, ì bè kɛɛ ka bò ì kpitilu má ì shitea musu, má ì kaa kirikeɛlu. Ini ye kpɛ bua, ma tɔ gūa biima, má tua ina aɛ kirikeɛlu hari dipai. Mani ye gūa bii ì djii, ini kīn gūa bii ma ni. Ina taalikè, má azukaa'ima kūni gyaazɔ, laaka guɛɛ tà gū wā. Amaa mába nɔkɛɛ kata'ima laaka ma kàta Sauluma ka ma bò kirikeɛlu Dauda wataluba. Ì bena kirikea dipai. Ì kirike ginaa ba inceaba.

Ye Natana yā ginaa deedeekè Daudani laaka Zɔnadi fi'ini pai.

Dauda wotukɛna Zɔnadima

Ye kiri Dauda gē ì àɛ Zɔnadi watalu ì kè: Zɔnadi Ladu, bón mani? Dinɔn ma wei gūna ye n ma bùru marekɛ le takama? Zɔnadi Ladu, beɛ kè'nni jīn hari beɛɛ, ye mani n zɔkɛda bena ka àgūa bii lefū n à yā fi mɔnɔa? Laale mbi kɛmania, Zɔnadi Ladu? Zɔnadi Ladu, má kɛa'nni laala mɔnɔ? Mani n zɔkɛda n ma dǝ. N yā ashi ginaa kè laaka n waaji alkawali ka n kèmani yāaji, ye n tù mani n zɔkɛda ma dǝ. Zɔnadi Ladu, n ashi fa!

Gũkan ba du nzɔba. N baashiba Ladu kɛ ba biiba, laaka wo mà kũni tɔnɔzɔ. Dimi du n gũ Isra'ilanazɔ? Dunia benalu bè du ginaa ye n bɔ̀ n gũna. N n ginda tɔbɔ̀, n fɔ ashina kũni dabodabonazɔ kɛ n gũnanɔni, n bè kena kũni à dɔmanazɔ kɛkɛ n gũnani ka n à bɔ̀ Masar. N Isra'ilana dɛ ànagũ bii n gũna hari dipai. Zɔnadi, n gbɛɛgũ à Ladu. Zɔnadi Ladu, alkawali ka n kɛ mani n zɔkɛdani kũni ma benazɔ musu, ò dɛkinakema dipai. Kɛ laaka n fi, n tɔ nà bɔ̀ nɔɔnɔɔ hari dipai. Gũna kɛa Zɔnadi Dɛbunadimi Isra'ilana Ladu, mɔnɔ mani n zɔkɛda Dauda, ń ma bena misaa gifaa, zaaka Zɔnadi Dɛbunadi Isra'ilana Ladu, n fimani n kɛ ń ma kwaace gifaamani ma bena gbɔ̀daliguu. Ì yāaji ye tũ mani n zɔkɛda ma zũngbādaakɛ, ma wotu lɛɛ kɛ'mma. Zɔnadi Ladu, nnimi Ladu, n yā aminci zɔ, ye n yā nɔɔ ginaa fi mani n zɔkɛdani. Albalikaka mani n zɔkɛda benani bɛɛɛ, ò weretɛɛ'ama dipai. Zɔnadi Ladu, n yāfi, n albalikakà mani n zɔkɛda benani, à albalika lia dipai.

Dauda dɛbubina bè kenama

Bɛɛ gbɛji Dauda dɛbuubì Filishitininama ò à làbu ò à fara ashi Gata shì'ama. Ì dɛbuubì Mɔabunama, ye ò tũ à wùɛ kũ kutu cɛɛ, ò bɛɛ yɔ̀'ama. Ina bè fia gũna dɛdɛ, ita bè du gũna tu hundiizɔ. Ye Mɔabuna gbɛɛgũ Dauda zɔkɛdana, ye àta jangali kpa'ini. Dauda dɛbuubì Lehubu ni Hadadejɛɛ, Zoba kirima, lootoo ka kiri ginaa cɛɛ ibi yaa utɔɔji Ufaraiti lɛ gũnama. Ye ò ò bisaguruna kũkũ dubu du (1,000) kũni bisagurunadinazɔ dubu kee'awokoore (7,000) kũni gishitadanazɔ dubu keedu

(20,000). Ye ì à bisana kēnēē jējē pai, guda keesɔru ye b̀. Suriana ka bii Damasaku ǹ Adadejēē faabakeēji, ye Dauda ì à gūna d̀d̀e dubu keedu awerefiāzo (22,000). Ì gudādana d̀di Suria c̀erelu, ye à gb̀ēgū ì z̀kedana, àta jangali kpa'ini. Z̀nadi t̀ Dauda d̀ēbuub̀ guulu ka ì yà pai. Dauda Hadadejēē ibana wula leb̀na sh̀te ì yàzo Urusalima. Ì m̀tēē sh̀te gbāa bakara Hadadejēē faranalu ka ẁta ke Teba kūni Berotaizo.

Ka Hamata kiri Tou mà Dauda d̀ēbuub̀ Hadadejēē d̀ēbudanama pai, ye ì a ni Hadoramu d̀ē hookpaaji'ini. Ì ì saabukpà d̀ēbuu yāaji ka ì b̀ Hadadejēēma, zaaka Tou d̀ēbuukē'izo yāa. Hadoramu ǹ kūni wula f̀naz̀ kūni anzarafu f̀naz̀ kūni m̀tē f̀naz̀, ye kiri Dauda kà Z̀nadi mu, laaka ì kē kūni bena ka ì à b̀ anzarafuz̀ kūni wulaaz̀ pai, Èd̀muna kūni M̀abunaz̀ kūni Am̀ninaz̀ kūni Filishitininaz̀ kūni Amalekinaz̀. Laale ì kē kūni f̀naz̀ ka ì sh̀te Zoba kiri Hadadejēē, Lehubu nima. Laale Dauda t̀b̀. Ka ì d̀ēbuub̀ Suriama ì c̀, ì Èd̀muna d̀d̀e Guwucena Wishinadilu dubu koori aweresoowaz̀ (18,000). Ye ì gudādana d̀di Èd̀mu c̀erelu m̀ǹ, ye Èd̀munaǹ gb̀ēgū ì z̀kedana. Guu ka Dauda yà pai Z̀nadi t̀ ì d̀ēbuub̀.

Daudami Isra'ila bè pai kiri, ì f̀nɔ̀kē ì gūnani ì jerema. Jeruya ni Yoabumi ì d̀ēbukedana watalu. Ahiludi ni Yehosafami ì kasheedikada. Ahitubu ni Zadoki kūni Abiata ni Ahimelekiz̀mi sāmakinina. Shelayami ì takadakēda. Yehoyada ni Benayami ì dogarina guce ashi. Dauda ginda ni nigōninami ì fiadibina.

Dauda gucekekena Mefibosheni

Dauda gūna làlu ì kè: Saulu bè kée ci gbèegūba dee? Ma waaji mà gucekeke'ini Yonatã yāaji. Saulu kwaace zókeda kée bii, ì tōmi Jiba, ye wò ì shìshi kiri Daudani. Ì ì làlu ì kè: Nnimi Jibaa? Ì wì'ini ì kè: Ee, n zókedami mani. Ye kiri ì làlu ì kè: Saulu bè kée bii hari becéé? Nwókéé ka Ladu zó má waaji mà ké'ini. Ye Jiba wì'ini ì kè: Yonatã ni kée bii hari becé. Èrèemi. Ye kiri ì ì làlu ì kè: Ì bii maa? Jiba wì'ini ì kè: Ì bii Amieli ni Makiri wei Lodebaa. Kiri Dauda gūna dè, ye wò nù'izó. Ka Yonatã ni Mefiboshe, Saulu toi bùru Dauda gu, ì kùcè'ini ì wùcè ì gberèema. Ye Dauda kè: Mefiboshe! Ì wì'ini ì kè: N zókedami mani. Ye Dauda fì'ini: M̃ba tu wohu nà n kūba, zaaka má gucekeke'nni n djii Yonatã yāaji. Má n diji Saulu jena cēa'nni pai, ñ nua fóbiijimazo dipai. Mefiboshe kùcè'ini ì kè: Bón mani n zókeda ka n ma were wà? Ma bii du gbē geezó.

Ye kiri Saulu dikinakeda Jiba shìshi, ì kè'ini: Fó ka bii Saulu mu kūni ì wei gūna fózó pai, ma kpà n zónadi toini. Nni kūni n ninazó kūni n zókedanazó, à ì cere dikinaakea'ini, à ì fona mawókea, dun ina fósubwó li. N zónadi toi Mefiboshe fóbiamazo dipai. Jiba kīn ì ni nigōnina zó wakaasóru kūni zókedanazó keedu. Ye Jiba fì kirini: Fó ka ma zónadi kiri fì mani n zókedani, má kea pai. Ye Mefiboshe fóbì kūni kirizó, ì gbèegū du kiri ni duuzó. Mefiboshe nigōni zó, ì tōmi Mika, mawó Jiba weigūnami ì zókedana pai. Ì bii Urusalima, zaaka ita fóbi kūni kirizó dipai. Inimi eréé.

Dauda dēbubina Amōninama

Bee gbēji Amōnina kiri gā, ye ì ni Hanuni àce ì gurubi. Dauda kè: Má gucekekeke Naasa ni Anunini laaka ì djii gucekekekèmani yāa. Ye Dauda ì iba kena dē'ima, àna yaa Amōni cerelu àna ì zūn ē ì djii gaa yā musu. Ka Dauda ibanano bùru gube, Amōni kirina fi à zōnadi Hanunini: Mbi waa Dauda gūna dē n djii gee kpetanaa yāaji dun ina n zūn'ē'nni koo? Ì à dē àna nu wo fara ashiri waaji, à cēea àna nu ì musai keeji. Ye Hanuni Dauda ibanano kùkū ì à lekākā tātāna wàra, ì à asuna jējē buden à kpiti'unama suusu, ye ì à dà. Ka wò fi Daudani, ye ì gūna dē àna yaa daaji'àle, zaaka uni ì à kù nɔɔnɔ. À fi'ani: Kiri kè, à ace Yariko hari a lekākāna nà shiibo à gīnaa ci.

Ka Amōnina wà Dauda ba waa nno gbīnyāji mɔnɔba, ye à findebù gūnani àna dēbuuke'àni: Suriana ka bii Lehobu kūni Zobazo à gishitadana dubu keedu (20,000) kūni kiri Maaka dēbukedana dubu du (1,000) kūni Tobu gūna dubu koori awerefiazɔ (12,000). Ka Dauda ì baalu mà, ye ì Yoabu dē'àji kūni dēbukedanazo pai. Amōnina bɔ à dēbu'ɔɔfùru à fara bīnni lema, ye Zoba kūni Lehobu Suriazɔ kūni Tobu gūnazɔ kūni Maaka gūnazɔ à bii lahoolu à din. Ka Yoabu wà wò dēbu'ɔɔfùru a watalu kūni a gbējizɔ, ye ì Isra'ila dēbukeda nɔɔna bòwi ì à dē àna yaa fēeji Suriama. Ye ì dēbukeda kutuna nà ì daku Abisai ɔlu, ye ì à dē àna yaa fēeji Amōninama. Ì kè: Suriana gbādaa nà kpamala, nu n ma gaake. Amōnina gbādaa nà kpa'nla kīn, má nua n gaakeeji. Zūngbādaake, wò nigōnikēe ke wo gūnani kūni wo Ladu faranazɔ. Yā ka kè Zōnadini nda

kɛa. Ye Yoabu kūni dēbukɛdana ka bii'izɔ à yà Suriama kūni dēbuuzɔ, ye Suriananɔ bashì'àni. Ka Amɔnina wà Suriana bashì, ye à bashì Abisaini kīn, à gɛ̀ faralu, ye Yoabu ì à tù gubɛ, ì yà Urusalima.

Ka Suriana wà Isra'ilana dēbuubì'nnɔma, ye à cɛɛ à dākū. Ye Hadadejɛɛ gūna dɛ̀, à cì kūni Surianazɔ ka bii Ufaraiti baaji, ye à yà Helamu. Sobakimi Hadadejɛɛ dēbudananɔ watalu. Ka Dauda ì baalu mà, ye ì Isra'ilana dākū pai, ì bùra'àzɔ Urudūma ì yà Helamu. Ye Suriana dēbu'ɔɔfùru'iji, ye à gɛ̀ kūlu. Ka àbi bashia Isra'ilanani, ye Dauda ì à dèdɛ bisagurunadina keesɔru ɔɔfia (700) kūni gishitadanazɔ gū dubu keefia (40,000). Gubɛ wò à dēbukɛdana watalu Sobaki dɛ̀. Ka kirina ka bii Hadadejɛɛ zɔkɛdana wà Isra'ilana dēbuubì'àma laalɛ, ye à lɛkɛdukè kūni Isra'ilanazɔ, à gbèegū à zɔkɛdana. Wohu Suriana kù, àci yaa Amɔnina gaakeɛji mɔnɔba.

Dauda wina Bashebaji

Ka bɔɔkɛ dɛɛɛ nà kutu, lootoo ka kirina tà yaa dēbuuji, ye Dauda Yoabu dɛ̀ kūni a ibanazɔ kūni Isra'ilanazɔ pai. À Amɔnina kàkacɛ, ye à lika Labaji. Dauda kīn ì bii Urusalima. Ka itɔkɛɛ kè, ye Dauda kpɛtɛ a wucebɔɔma, ibi likaa ì kpɛ musu. Zaa kpɛ musu gubɛ ì negū kɛɛ wà, ibi zurua. Negū ginaa negū nɔɔmi nɔɔnɔɔ, ye ì gū dɛ̀ negū ginaa yā laluuji. Ye wò fì'ini: Eliamu ni Basheban be, Hiti bee Uri nɛɛmi. Ye Dauda gūna dɛ̀ àna ì shishi. Ka ì nù, ye Dauda wùcɛ'izɔ, ye negū

ginaa yà kpɛ. Ini kɪn ì kpɛgbɛjiwà dɛɛ. Ka ì gbishekè, ye ì lekpellekè Daudani ì kè a gbishekè.

Ye Dauda gũ dɛ Yoabuma ì kè: Hiti bee Uri damani. Ye Yoabu ì ì dà'ini. Ka Uri nù, ye Dauda Yoabu baani làlu kũni dɛbukedanazɔ kũni dɛbuuzɔ ka àbi kɛa. Ye Dauda fi'ini: Yaa kpɛ n zuru. Ka Uri bò kiri wei, ye kiri gũ dɛ'ini kũni fɔbinaazɔ. Amaa Uri ci yaa kpɛba, kiri wei kata ye ì ì kũni ì zɔnadi zɔkedanazɔ. Ye wò fi Daudani wò kè: Uri ci yaa kpɛba. Ye ì Uri làlu ì kè: Ma dɔ̃ n cì tanaaji dɛɛ? Bɔyāaji nci yaa kpɛba? Uri wì'ini ì kè: Adakaa kũni Isra'ilanazɔ kũni Yahudanazɔ bii bishekpɛnalɔ. Ma zɔnadi Yoabu kũni ì gũnazɔ bii lahoolu. Mába fɔa mà yaa kpɛ mà fɔbi mà imi, mà wuce kũni ma nɛɛzɔba. Kũni n hundiizɔ mába yā ginaa kɛaba. Ye Dauda fi'ini: Gbɛgũ gule cece mɔnɔ, lefũ má n daa. Ye Uri gbɛgũ Urusalima dibɛedi kũni di dɔɔzɔ mɔnɔ. Dauda ì ì shishi, ì fɔbì ì imì'izɔ, ye Dauda i kpà'ini ì kà. Amaa ka ì bò itɔkɛ, ì yà ì ì kũni a zɔnadi kiri zɔkedanazɔ, ici yaa kpɛba. Ka di kɛ, Dauda Yoabuni, ye ì Uri dàzɔ. Takada ginaalu ì kè: À Uri kɛ watalu guulu ka dɛbuu gbāda, à cɛɛ ì gbɛji, dun wòna ì dè.

Lootoo ka Yoabu bi likaa fara ginaaji, ye ì Uri kà guulu ka ì dɔ̃ gũ gbādana bii. Ka fara gũna bò àbi dɛbuukɛa kũni Yoabuzɔ, à Dauda dɛbukeda kena dɛdɛ. Hiti bee Uri bii'alu.

Ye Yoabu gũ dɛ Daudama ina dɛbu yā deedeekɛ'ini pai. Ì fi mɔzɔ ginaani: Nna dɛbu yā deedeekè kirini pai n ìncɛ, ina zũn fa ì n lalua ina kɛ: Bó ye tù a nù farazɔ kutu kũni dɛbuuzɔ? Aci dɔ̃ ka bɪnnimusunadina tà kɔɔ zu'àma cɛɛba dee? Dí ye Gedeɔ̃

ni Abimeleki dè? Nēgū ye ɔkpà wishilɔgbereɛji zaa bīnni musu, ye ì ì dè Tebejeba dee? Ì kè laala a nù kutu bīnnizɔ laale? Ina fi'nni laale, fi'ini ì zɔkɛda Uri, Hiti bee gà mɔnɔ. Ye mɔzɔ ginaa dò jerema. Ka ì bùru Dauda gu, yā ka Yoabu kà'ini ì fi'ini pai. Ì kè: Gūna bò faralu, àbi gbādaa mɔawoni gufuma, ye wò à kèkè hari à fara bīnni lema. À kɔzudana bii bīnni musu, ye à kɔz zùzu n zɔkɛdanalu cere, à à gūkena dèdè. N zɔkɛda Uri, Hiti bee gà mɔnɔ. Ye Dauda fi mɔzɔ ginaani: Fi Yoabuni inaba tu yā ginaa nà ɔ'imaba. Gūna ka dēbuu à bia wòbata dōba. Ina dēɛkè kūni fara ginaa gūnazɔ kūni gbādaazɔ, ina à kakacɛ. N̄ ì gba zūngbādaa laale. Ka Uri nɛɛ mà a zā gà, ì ù. Ka ge'unaa ìncɛ, Dauda gūna dē, à cì'izɔ Dauda wei, ye ì gbèegū ì nɛɛ. Ì nì'izɔ nigōni, ye yā ginaa ka Dauda kè ci kɛ Zɔnadini ndaba.

Annabi Natana Dauda gbana laakali

Zɔnadi Natana dē Daudama. Ka ì bùru, ì kè'ini: Nigōni fia kena ye bii fara dulu, gū duu kawerenadimi, duu kīn taabinadimi. Kawerenadi ginaa tambuna zɔ kūni dinazɔ gbāa bakara, taabinadi ginaa kīn iba fɔkan zɔba, tambu nifi du kɛɛ ye ì lù. Ye ì ɔlikaji, ì ashikè kūni ì ninazɔ ledule ì wei. Àta fɔ duu bi, àta imi fɛ dulu, ita wuce ì pɔcema, ye ibi toroa du ì ginda ni nēgūzɔ. Ka nibaa ìcɛ kawerenadi ginaama, ye ici wi ì tambu koo dii kù a kaliilu ina ì nibakeeshiba, taabinadi tambu nifi ginaa ye ì shì'ima, ì ì nibakeeshizɔ. Ye Dauda zūn fà kawerenadi ginaa musu nɔnɔ, ì fi Natanani: Zɔnadi bii! Gū ka yā ginaa kè ì kù wòna ì dè. Laaka laale ì kè, ici ì indawere

waba, ina tambu ginaa findebu tara shi. Ye Natana fi Daudani: Nnimi gũ ginaa. Zɔnadi Isra'ilana Ladu ye yā lɛɛ fi ì kè: Ma n kà Isra'ilana kiri, ma n bɔ Saulu ɔɔlu, ye ma n zɔnadi ginaa wei kpà'n̄ni, ma ì nena nà n ɔɔlu. Ma Isra'ilana kũni Yahudanazɔ kpà'n̄ni n gũna. Bɛɛ nà kè'n̄ni jīn, má kena lafaa'n̄ni. Bɔyāaji n dɔkè ma yāzɔ? Fɔ ka mába waajiba n kè, n Hiti bee Uri dè kũni takubazɔ, n ì nɛɛ shì nɛɛ. N tù Amɔnina à ì dè dēbuulu. Zaa cece fɔ zaa ba kataa n weima dikan mɔnɔba, zaaka n dɔkèmazɔ, n Hiti bee Uri nɛɛ shì nɛɛ. Ye Zɔnadi cēɛ ì yā lɛɛ fi ì kè: Ma! Má tua n ginda wei gũna nà bɔ n gbēji. Má n nena shia'mma, má à kpaa n gūduni n wadajīn, ì wucea'ázɔ gufuma. N fɔkè kpetanaalu. Mani kīn má fɔ ginaa kea'n̄ni gufuma Isra'ilana pai wadajīn.

Ye Dauda fi Natanani: Ma zunubikè Zɔnadini. Ye Natana fi'ini: Zɔnadi n zunubi kàta'mma, m̄ba gaaba. Amaa laaka n tù Zɔnadi jedina dɔkè'izɔ nɔɔnɔɔ fɔ ginaa kenaa musu, nigōni ka negũ ginaa ì'nzɔ gaa. Ka Natana yà kpɛ, ye Zɔnadi tù ni ka Uri nɛɛ ì kũni Daudazɔ gɛɛ shìtɛ. Ye Dauda bi kūsūkpetɛa Laduni ni ginaa musu kũni lɛ'irinaazɔ, gāɔni ita wuce cerema. Ì wei marena tà duce'ima ina kpete cerema, amaa ibata wijiba, mɔnɔ ibata fɔbi'ázɔba. Di sɔɔfiadibi ye ni ginaa gà. Wohu Dauda ibana kũ, àci fɔ àna fi'ini ni ginaa gàba. À kè: Lootoo ka ni ginaa bii, wo yāfi'ini, ici wo yā maba. Laala wó fia'ini bece ni ginaa gà? Ì fɔvānikɛa. Dauda wà a ibana bi yākūkūfia kũni, ye ì dō ni ginaa gà. Ì à làlu ì kè: Ni ginaa gàa? Ye à wì'ini à kè: Ee! Ì gà. Dauda kpètɛ cerema, ì zùru ì yōnɔ dòkɔ ì ì asuna sòri,

ye ì yà ì kùce Zɔnadini ì koru. Ka ì cɛɛ ì yà kpe, ì fɔbinaa wotukè, ye wò kpà'ini, ì bì. Ì ibana à ì làlu à kè: Ì kè laala mbi fɔkea laale? Lootoo ka ni ginaa bii, n le'iri n ù. Ka ì gà bece, n kpète n fɔbì. Ì wì'àni ì kè: Lootoo ka ni ginaa bii, ma le'iri ma ù, zaaka ma kè, Zɔnadi nà ma were wa ì tua ni ginaa nagū bii, dí ye dǝ? Laaka ì gà bece, bɔyǎaji má le'iria mɔɔɔ? Má fɔa mà ì kpete koo? Má yaa ì gu, amaa ini iba cɛɛa ina nu ma guba.

Dauda ì nɛ Bashɛba ɛ, ye ì yà ì wùcɛ'izɔ. Ì nì'ì nigɔni, ye ì tɔkà'ini Sulemanu. Zɔnadi waa'iji, ye ì annabi Natana dɛ'ima ì tɔkà ni ginaani Yedidia dun Zɔnadi waa'iji.

Laba shina Amɔninama

Yoabu dɛɛkè kūni Amɔninazɔ Laba, ye ì kiri wei shì. Ye ì gūna dɛ Daudama ì kè: Ma dɛɛkè kūni Laba gūnazɔ, ye ma à itɔgu shì. Dɛbukɛda kutuna dakū bece, n nu n lika fara ginaaji, n shi. Inaaci ke laaleba, má shia, wò ma tɔkaa'ini. Ye Dauda dɛbukɛdana dākū pai, ì yà ì sùte Labama ì shì. Wò à kiri wula fula ùru ì miima, wò kpà Daudani. Ì gbĩtā bùru kilo kedokoori, mɔɔ gberɛ darajanadi biima. Ì fara ginaa fɔna dākū bakara, ye gūna ka bii gube ì à kùkū ì bò'àzɔ, ì à kà jetu dikinaalu kūni diga dikinaazɔ kūni mɔni dikinaazɔ, mɔɔ ì tù àna kukū bɔ. Laale ì kè Amɔni faranani pai, ye ì cɛɛ ì yà Urusalima kūni ì dɛbukɛdanazɔ pai.